

mereka itu, entah kerana tidak cukup sihatnya, membabit-babit perkara-perkara yang tidak ada kena mengena atas diri orang lain yang tidak disukainya.

Bahayanya keadaan-keadaan seperti ini sangat besar kepada jalan berfikir seseorang. Bahaya inilah juga yang nampaknya tidak diperkenani oleh Majlis Raja-Raja Melayu lalu mencari jalan yang lebih aman, supaya dibawa perkara ini dengan rundingan yang baik, iaitu jalan aman dan damai yang lebih memberi manfaat daripada banyaknya ribut-ribut sedang di dalam pada itu banyak perkara yang lebih besar yang tertinggal begitu sahaja.

Penerbitnya juga banyak menerima tuduhan-tuduhan seperti pengarangnya tetapi sebagaimana yang pernah diterangkan oleh penerbitannya bahawa usaha penerbitan itu adalah mengeluarkan berbagai-bagai macam kitab-kitab agama – sama ada yang di dalam lingkungan mazhab – atau tidak – adalah terus diterbitkan asalkan sahaja tidak menyalahi daripada ajaran yang bersendi kepada kitab Allah dan sunah Rasul-Nya Muhammad *ṣallā Allah ‘alayhi wa sallam*.

Pihak kita tidak mahu membahas sesuatu fatwa yang diterbitkan oleh sesiapa pun sama ada hanya berdasar kepada pendapatnya sendiri sahaja – apa lagi berdasar kepada ajaran kitab Allah dan sunnah tetapi kita akan terus menentang, sesiapa pun, apabila mereka tidak mahu membahas perkara yang jadi masalah tetapi yang dibahas adalah lain daripadanya seperti mengeluarkan tuduhan-tuduhan yang berupa fitnah dengan tidak alasan dan jauh daripada masalahnya.

Kita menganjurkan kepada kedua-dua pihak supaya bahaslah perkara-perkara agama itu dengan luasnya. Perbahasan itu buatlah secara ilmiah – tidak membahas sesuatu

dengan cara lain perkara di bahas lain perkara timbul – timbul tuduh menuduh – kerana yang demikian merugikan dan tidak ada memberi apa-apa faedah langsung. Agama membebaskan seseorang membahas sesuatu perkara dengan baik dan jujur tetapi agama menegah dalam memberi pendapat ini kafir mengkafirkan seseorang kerana tidak ada hak seseorang manusia mengkafirkan seseorang saudaranya yang lain.

\* \* \*

Hadiah Novel Dewan Bahasa

Baharu-baharu ini Dewan Bahasa dan Pustaka Persekutuan Tanah Melayu telah menjemput pengarang-pengarang<sup>1</sup> Melayu menghantarkan karangan di dalam bahagian novel untuk dijadikan peraduan dengan diberikan hadiah-hadiah yang tertentu yang disediakan oleh Dewan Bahasa itu.

Banyak orang menghantarkan karangannya terutamanya daripada guru-guru Melayu dan termasuk dua orang wartawan. Menurut Tuan Syed Nasir Pengarah Dewan Bahasa, tidak ada seseorang pun daripada penuntut-penuntut universiti yang mengambil bahagia di dalamnya – dan harus pula, menurut pendapat kita orang-orang profesional di dalam karang mengarang tidak ada pun yang mengambil bahagian atau pun yang telah menghantarkan karangan-karangan mereka.

Karangan-karangan yang mendapat hadiah itu, menurut apa yang tersiar, akan dicetak dan diterbitkan oleh Dewan Bahasa dan pengarang-pengarang itu akan diberi royalti di atas karangannya apabila ia diterbitkan kelak.

Keputusan daripada peraduan mengarang novel ini telah diisytiharkan dan kesudahannya tidak ada seseorang pun yang mendapat hadiah yang pertama kerana tidak ada sebuah karangan pun yang telah dihantarkan yang dapat sampai kepada

---

<sup>1</sup> Dalam Qalam di eja sebagai ‘Pengawang’

darjah karangan yang dikehendaki kepada taraf hadiah yang pertama itu

Sesungguhnya langkah Dewan Bahasa ini patut dipuji untuk menggalakkan pengarang-pengarang mengarang cerita-cerita novel yang berfaedah kepada masyarakat. Galakkan-galakkan ini tentunya menambah lagi kemahuan kepada pengarang-pengarang mengarang cerita-cerita di dalam masa lapangnya dengan susunannya lebih baik, ceritanya berfaedah dan boleh menjadi perbandingan – tidak mengarang cerita-cerita asalkan jadi sahaja serta tidak ada tempat yang menghargainya. Dengan anjuran Dewan Bahasa ini, maka bukannya sahaja ia sebagai suatu penggalak tetapi juga sebagai suatu tampungan pengarang-pengarang itu mencuba memajukan dirinya di dalam karang mengarang kerana bagi sesebuah penerbitan di luar tentu tidak akan mampu membuat seperti yang dibuat oleh Dewan Bahasa untuk melayan karangan-karangan yang dihantarkan oleh mereka.


Keputusan-keputusan yang diberi oleh Dewan Bahasa kepada pemenang-pemennangnya itu tidaklah boleh dijadikan ukuran sebagai karangan yang terbaik sekali di dalam novel yang boleh dibuat oleh pengarang-pengarang Melayu disebabkan banyak lagi pengarang-pengarang itu tidak mengambil bahagian di dalamnya. Kerana itu kita menganjurkan tatkala memilih karangan-karangan novel yang baik sekali janganlah hendaknya dipinta atas hantaran-hantaran karangan kepada Dewan Bahasa sahaja tetapi patut juga dibukukan kepada karangan-karangan yang diterbitkan pada masa-masa yang ditentukan supaya diselidiki dan diberi hadiah kerana ada pengarang-pengarang yang menerbitkan sendiri karangannya menerusi penerbitan-penerbitan yang ia berikat dengannya.

Dengan cara begini mudah-mudahan dapat di agak adakah sebenarnya pengarang-pengarang itu berkebolehan di dalam karang mengarang –

dan karangan-karangan yang dibuat mereka biarlah bebas untuk diterbitkan oleh mereka.

Mudah-mudahan hal ini dapat perhatian Dewan Bahasa dan Pustaka supaya keputusan-keputusan daripada peraturan ini akan meliputi semua karangan pengarang-pengarang Melayu – tidak terhad kepada karangan-karangan yang dihantarkan sahaja kerana Dewan Bahasa adalah sepatutnya meluaskan langkahnya kepada perkara-perkara yang am daripada masa yang telah lalu itu.

\* \* \*



Ubat beranak yang masyhur ini sangat digemari oleh ibu-ibu yang beranak di serata Tanah Melayu, Sarawak, Brunei dan Siam.

Dengan menggunakan ubat ini **tak payah berdiang – tak payah bersalai**, badan sentiasa sihat dan segar.

**Sekotak \$15.50 cukup untuk pergunaan sekali beranak. Tambah belanja pos 60 sen.**

YAHYA ARIFF

37, Jalan Kangsar, Kuala Kangsar